

6. maj 2010

UPA 2010/120

**Utoqqalinermi pensionisiat pillugit Inatsisartut peqqussutaannik
allanngortitsineq pillugu Inatsisartut peqqussutaat nr. xx, xx 2010-meersoq
(Toqukkut qimagunnerup kingorna tunniussisarneq)**

(Isumaginninnermut Naalakkersuisoq)

pillugu

Ilaqutariinnermut Ataatsimiititaliap

ISUMALIUTISSIISUTAA

Siunnersuutip aappassaaneerneqarnerani saqqummiunneqartoq

Ilaqutariinnermut Ataatsimiititaliaq kingullermik suliarinninnermini ukuningga inuttaqarpoq:

Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Jane Petersen, Inuit Ataqtigiit
Inatsisartunut ilaasortaq Andreas Uldum, Demokraatit
Inatsisartunut ilaasortaq Ruth Heilmann, Siumut
Inatsisartunut ilaasortaq Knud Kristiansen, Atassut

Siunnersuut kiisalu siunnersuutip siullermeerneqarnerani UPA 2010-mi ulloq 27. april 2010-mi ingerlanneqartoq aammalu Inatsisartunut ilaasortat Naalakkersuisullu tamarmik siunnersuummut oqaaseqaatiminnik saqqummiussinissaannik periarfissiiffiusoq Ilaqutariinnermut Ataatsimiititaliap erseqqinnerusumik misissorpai.

Siunnersuut pillugu

Siunnersuutip saqqummiunneqarneranut tunngaviuvoq aalajangiiffigisassatut siunnersuutip UKA 2009/44-p akuersissutigineqarnera, taanna inaarutaasumik akuersissutigineqarami ima oqaasertaqarpoq:

Katissimallutik aappariit inooqatigiilluunniit aappaata toqunerani qimagaasoq toqukkut qimaguttup utoqqalinermi imaluunniit siusinaartumik pensionisiaanik qaammagini marlunni pisartagaqarsinnaaqqullugu utoqqalinermi pensionisat aammalu siusinaartumik pensionisiat pillugit maleruagassanut allannguutissatut siunnersuummik 2010-mi saqqummiussinissamut Naalakkersuisut peqquneqarnissaannik aalajangiiffigisassatut siunnersuut.

Siunnersuut pillugu tusarniaaneq

Siunnersuut attuumassuteqartunut tusarniaassutigineqarsimavoq.

Ilaqutariinnermut Ataatsimiititaliap oqaaseqaatai

Siunnersuut saqqummiunneqartoq Ilaqutariinnermut Ataatsimiititaliamit tikilluaqquneqarpoq. Siunnersuut saqqummiunneqartoq aalajangiiffigisassatut siunnersuummit qulaani taaneqartumit annertunerusoq Ilaqutariinnermut Ataatsimiititaliap isumaqarpoq, aalajangiiffigisassatummi siunnersuummi pensionisiallit katissimasut inooqatigiilluunniit pineqarmata. Utoqqalinermi pensionisiallip qimataata nammineq aamma pensionisiaqartuunissaa siunnersuummi saqqummiunneqartumi piunasaqaatigineqanngimmat Ilaqutariinnermut Ataatsimiititaliap eqqarsarnartoqartinnigilaa.

Siunnersuummulli nassuiaatit misissornerat erseqqissaateqarnissamut tunngavissiivoq. Siunnersuummut nassuiaatini § 1-imi oqaaseqatigiinni kingullerni kukkusumik ima allassimavoq:

“Taamaasilluni aalajangersagaq siunnersuutigineqartoq atorneqassanngilaq, pensionisiaqartoq toqukkut qimagunnermini katissimasaqanngippat inooqatigisaqanngippalluunniit.”

Utoqqalinermi pensionisiallip qimataata nammineq pensionisiaqartuunissaa inatsisip oqaasertaani aalajangiisuutinneqanngilaq. Utoqqalinermi pensionisiallit qimataannut (katissimallugu aapparisaannut inooqatigisaannulluunniit) tamanut siunnersuut sammitinneqarpoq aammalu siunnersuummut nassuiaatini kukkusumik allassimaneratut atuuffia annikillisarneqassanani.

Inassuteqaat

Siuliani erseqqissaatit ilanngullugit siunnersuut maanna ilusimisut iluseqartoq akuersissutigineqassasoq ataatsimiititaliap isumaqatigiittup inassutigaa.

Taama oqaaseqarluni Ilaqutariinnermut Ataatsimiititaliap siunnersuut aappasaaniigassanngortippaa.

Debora Kleist
Siulittaasoq

Jane Petersen

Andreas Uldum

Ruth Heilmann

Knud Kristiansen